

**HEADLINES**

- ۱۔ وزیر اعظم ریندر مودی غا 9 منتر بھارت ناہہ خود کفیل بنان واسطے عوام تی عہد کر غی اپیل کریں۔
- ۲۔ لعل چوک سرینگر مانہہ پولیس تے سی آر پی ایف نے مشترکہ کاروائی کی تے ہوٹلاں غی جانچ پڑتال کی۔
- ۳۔ جموں کشمیر حکومت نے جی پی ایف غی سود غی شرح 2 سہ مہینا واسطے 7.1 فی صد مقرر کی۔
- ۴۔ ریل خدمات غا 7وا مرحلہ مانہہ یکم دسمبر تیں 4 مزید ریل دوبارہ چلائی جیں غی۔
- ۵۔ محکمہ موسمیات نے پیش گوئی کی ہے کہ چار دسمبر توڑی زیادہ تر علاقوں مانہہ موسم خشک رہے گا۔

\*\*\*\*\*

**PM 9 MANTRAS**

وزیر اعظم نریندر مودی نے عوام تیں اپیل کی کہ وہ ملک واسطے 9 اہم عہد اختیار کریں وہ اڈپی مانہہ شری کرشن مت غا بھگتاں تیں خطاب کر رہیا تھا وزیر اعظم نریندر مودی نے جہڑا 9 عہد دسیا اُن مانہہ ایک مارو عظیم ہتھ تیں لکھی تحریر تے پُرانی تحریراں ناہہ محفوظ کرنو تھو اُنہاں نے مزید اس طرح کہیو۔ اُنہاں نے کہیو کہ ماری قدیم جانکاری تے علم اگلی نسل توڑی ضرور پُجنی چاہیے اُنہاں نے یوہ وی کہیو کہ ہر بھارتی کم از کم 25 ایسا مقامات غی سیر کرے جہڑی قدیم تہذیب تے روایت واسطے مشہور ہے وزیر اعظم نے اس گل ور زور دتو کہ بھگوت گیتا جہڑی بھگوان شری کرشن غی تعلیمات ہیں مرکزی حکومت غا زیادہ تر پروگراماں واسطے ایک بڑی رہنمائی ہے۔

\*\*\*\*\*

**SGR CASO**

سرینگر پولیس نے اج سویرے سی آر پی ایف غے نال مل غے لعل چوک علاقہ مانہہ ایک گھیراؤ کر غے تلاشی کاروائی کی یاہ تلاشی کاروائی اس واسطے کی گئی تانجے مصروف کاروباری علاقہ مانہہ حفاظت ناہہ مزید مضبوط بنایو جاسکے پولیس غی کئی ٹیمیں نے اچانک ہوٹلاں تے گیسٹ ہاؤس مانہہ جاغے مہماناں بارے جانچ کی تے یوہ دیکھیو کہ تمام انتظامات حفاظتی قوانین غے مطابق ہیں یا نی یاہ کاروائی کئی گھنٹاں توڑی جاری رہی تے اخیر توڑی کائے مشکوک چیز یا سرگرمی نی لہی اس طرح غی جانچ شہر مانہہ حفاظتی انتظامات ناہہ مضبوط کرن تے ماحول ناہہ محفوظ بنان واسطے وقت وقت ور کی ہے۔

\*\*\*\*\*

**GPF**

جموں کشمیر غا مالیاتی محکمہ نے جنرل پرویڈینٹ فنڈ گا منافع غی شرح مانہہ ترمیم کرتا وا نوو حکم جاری کیو ہے مرکزی وزارت خزانہ بھارتی حیکومت غی تازہ ہدایت ناہہ اختیار کرن تیں بعد جولائی تیں ستمبر 2025 تے اکتوبر تیں دسمبر 2025 دوائے سہ مہیناں واسطے شرح منافع 7 عشاریہ 1 فی صد مقرر کی گئی ہے یے نوا ریٹ مرکزی زیر انتظام جموں کشمیر غا تمام جی پی ایف غا اکاؤنٹ آلا ور لاگو وے گا۔

\*\*\*\*\*

## MINISTER ROASTER

جموں کشمیر حکومت نے دسمبر 2025 میں جنوری 2026 توڑی وزراء غو نوو روسٹر جاری کیو بے جس غے تحت وزراء سرینگر غا سیول سیکرٹریٹ مانہ عوام تی ملاقات واسطے مقررہ دنا مانہ موجود ریں غا۔ اس شڈیول غے مطابق صحت بارے وزیر سکینہ اتو 8 تیں 12 دسمبر توڑی، ٹرانسپورٹ غا وزیر ستیش شرما 15 تیں 19 دسمبر توڑی نائب وزیر اعلیٰ سریندر چودھری 22 تیں 26 دسمبر توڑی زرعی وزیر جاوید احمد ڈار 29 دسمبر تیں 2 جنوری 2026 توڑی تے جل شکتی غا وزیر جاوید احمد رانا 5 تیں 9 جوری 2026 توڑی سرینگر سیکرٹریٹ مانہ عوام واسطے دستیاب ریں غا۔

\*\*\*\*\*

## KISHTWAR LECTURE

سرکاری ڈگری کالج کشتواڑ گا این سی سی سی دستاں واسطے می 8 جر اکشے چتراوتی نے بھارتی فوج مانہ شمولیت غا موضوع ور حوصلہ اگرائی بارے تقریر کی اس تقریب گو مقصد بے جے نوجوان دستاں نانہ بھاری فوج مانہ اپنو مستقبل بنان تے نظم و ضبط قیادت تے قومی خدمت کی اقدار نانہ سمجھن بارے ترغیب دینو تھو مزکورہ پروگرام گو انعقاد 7 آسام رائفلز نے کرنل ہمانشو تھلیاری کمانڈنگ آفیسر 10 جے کے بٹالین این سی سی بھدرواہ تے پروفیسر بشارت اقبال پرنسپل گورنمنٹ ڈگری کالج کشتواڑ غے زیر اہتمام کیو تھو میجر اکشے چتراوتی نے اپنی تفصیلی تقریر مانہ دستاں نانہ بھارتی فوج مانہ داخلہ غی بکھ بکھ سکیمان بارے دسیو مزید جانکاری دیتا واں پروفیسر پرتھوی راج نے کہیو۔

\*\*\*\*\*

## TRAINS RESUMED

بہت انتظار تیں بعد، ادھمپور پٹھانکوٹ ڈی ایم یو تے شری شکتی ایکسپریس کٹرا تیں نوی دہلی سمیت چار ریل پہلی دسمبر 2025 تی دوبارہ چلنی شروع ہو جے غی اس تیں پہلاں 6 مراحل مانہ ریل دوبارہ شروع ہو چکی ہیں جس مانہ جموں صوبہ مانہ ریل غی آمدرفت آہستہ آہستہ معمول ور آرنی بے 26 اگست نانہ لگاتار بارش تے پانی پر جان غی وجہ تیں ریل غا پلاں تے ریلان نانہ نقصان پُجیو تھو جس تیں بعد ریل خدمات متاثر ہوئی تھیں 7 واں مرحلہ مانہ جہڑی ریل دوبارہ تیں چلیں غی اُن مانہ شامل ہیں ریل نمبر 14662 ریل نمبر 22462 ریل نمبر 74906۔

\*\*\*\*\*

## KASHMIR AWARDS

ریناواری تیں منظور احمد خان تے عالم گیری بازار تیں کھواجہ نظیر علی نانہ وزارت ٹیکس ٹائیل بھارتی حکومت غی طرفوں قومی اعزاز سنگ نوازیو گیو اُنہاں نانہ ہتھان تیں بنائی کارپیٹ تے سوزنی کڑجائی مانہ بہترین فن غو مظاہرو کرن ور اعزاز تیں نوازیو گیو۔ یوہ اعزاز 9 دسمبر نانہ نوی دہلی غا وگیان بھون مانہ صدر جمہوریہ غی جانب تیں پیش کیو جے غو۔ دو مزید بٹر مند مشکور حمید تے میر ارشد حسین غی خصوصی تعاریف کی گئی حکام غو کہنوبے کہ اس اعتراف فن تیں کشمیر غی دستکاری نانہ ملکی تے بین العوامی سطح ور مزید فروغ لبے غو۔

\*\*\*\*\*

## AYUSH RAMBAN

آیوش محکمہ رام بن نے آیوش وزارت غے تحت ضلع مانہہ دواياں غا بوٹاں غی ترقی تے کاشت نانہہ فروغ دین بارے پروگرام گو انعقاد کیو جارہی و بے دواياں غا بوٹاں جہرا کافی ویلا تیں روایتی ادویات مانہہ استعمال ہوتا رہیا ہیں یہ کیمیکل تیار کری جس سنگ کیڑا تے بیماریاں توں بچیو جاسکے اس اقدام گو مقصد ان بوٹاں غی کاشت نانہہ مقامی کاشتکاری غا نظام مانہہ ضم کرنو بہت جس سنگ صحت تے تدرستی غی حمایت کرتا وا پائیداد زرعی طریقہ غی حوصلہ افزائی کی جے اعلیٰ طبعی آفیسر تے ضلع یوگا کواڈرینیٹر ڈاکٹر مسعود اقبال زرگر نے اس طرح کہیو۔

\*\*\*\*\*

## WEATHER UPDATE

جموں کشمیر مانہہ آن آلا 5 تہاڑا گے دورا دوجہ حرارت مانہہ کہٹ و کہٹ 1 تیں 2 ڈگری سلشس کہٹ ہون غی اُمید بے محکمہ موسمیات نے 30 نومبر غی شام تیں 1 دسمبر سویرے موسم عام طور ور ابرالود رہن غی پیش گوئی کی بے جد کہ 4 دسمبر توڑی موسم عام طور ور خشک رہ غی اُمید بے تے 5 دسمبر دوپہر نانہہ چڑھ رہن گو امکان بے اس طرح وادی کشمیر غا مچ سارا علاقہ جدکہ جموں خط غا الگ تہلگ مقامات ور درمیانہ تہند پین گو امکان بے جس سنگ رات مانہہ ٹھنڈ وے غی محکمہ موسمیات غا ایک اہلکار نے مزید جانکاری دیتا وا اس طرح کہیو۔

\*\*\*\*\*